

50 onns cussegli da l'Europa

■ (anr) A chaschun dal giubileum 50 onns cussegli da l'Europa ha ina delegazion da la Svizra orientà venderdi passà las medias davart il svilup e las incumbensas dal cussegli da l'Europa. Il cussegli da l'Europa è vegni fundà, sin la proposta da Winston Churchill, l'onn 1949 sco organisaziun politica. Oz fan 40 stadis europeics part da questa organisaziun cun sedia permanenta a Strassburg. Las finamiras dal cussegli da l'Europa èn la protecziun dals dretgs umans ed il sustegn da la democrazia. Plinavant vul el promover la schientscha comunabla per la cultura e l'identidad europeica. Il cussegli s'engascha er per la protecziun da las minoritads en l'Europa. Cun diversas mesiras vul el rinforzar principalmain la stabilitat democratica en l'Europa ed uschia garantir la pasch tranter las nazions. Ina fitg impurtanta incarica ha il cussegli da l'Europa surpiglià avant diesch onns cura che l'imperi da la Russia è dà ensemble.

Co lavura il cussegli da l'Europa?

Il cussegli consista da traís organs: Il comité dals ministers, l'assamblea parlamentara cun 286 parlamentarias e parlamentaris or dals pajais commembers ed il congress da las regiuns. Il cussegli da l'Europa lavura cun il sistem da rapportaders. Per mintga pajais nua che problems duain vegnir schiliads vegn numnà in rapportader. Quel prenda in-vista da la situazion e rapportescha lura davart sias constataziuns. Uschia è per exemplu cusseglier naziunal *Dumeni Columberg* (guarda intervista) rapportader per la Moldavia, *Ernst Mühlmann* per la Russia. Sco Mühlmann, il vicepresident da l'assamblea parlamentara, ha ditg avant la pressa datti en Russia gronds progress, dentant era pass enavos.

I nè naturalmain betg simpel da far sa mover in pajais uschè grond sco la Russia cun sia lunga tradiziun zaristica e suenter 70 onns communissem. I saja

dentant reussì d'integrar parzialmain la Russia en l'Europa. La Russia na saja betg pli il factur smanatschant, ha accentuà Mühlmann.

La Svizra saja s'engaschada fitg en il cussegli da l'Europa perquai che tals engaschis lubeschian a noss pajais da tgirar e mantegnair ils contacts cun ils pajais europeics ed uschia impedir ina isolaziun, ha Mühlmann accentuà.

Dapli infurmazion en l'onn da giubileum

Il cussegli da l'Europa vul prender l'occasiun da l'onn giubilar per infumar meglier davart sias activitads. Uschia duain las scolas secundaras e professinalas vegnir infurmadas quest onn concernent incaricas e funcziuns dal cussegli. Per ils 29 d'avrigl datti ina sessiun da giuvenils ed ils quatter da matg cumpara ina marca speziala che fa attent a l'organisaziun che ha per mira principala da mantegnair la pasch e la segrezzza en l'Europa.